

Na osnovu članka 16. stavak 4. Zakona o Vladi Zeničko-dobojskog kantona-Pročišćeni tekst („Službene novine Zeničko-dobojskog kantona“ broj 7/10), na prijedlog Ministarstva za pravosuđe i upravu, Vlada Zeničko-dobojskog kantona, na 135. sjednici održanoj dana 14.11.2013. godine, d o n o s i

ODLUKU

O MJERILIMA I KRITERIJIMA ZA ZAKLJUČIVANJE VANSUDSKIH NAGODBI NA TERET PRORAČUNA ZENIČKO-DOBOJSKOG KANTONA

Članak 1. **(Predmet)**

Ovom Odlukom uređuje se jedinstven postupak, kriteriji i mjerila za zaključivanje vansudskih nagodbi sa tražiteljem izvršenja za izvršenje novčanih potraživanja koja su određena rješenjima o izvršenju nadležnog suda na osnovu pravosnažnih sudskih odluka, (u daljem tekstu: vansudska nagodba).

Članak 2. **(Sadržina prijedloga za vansudsku nagodbu)**

- (1) Zaključivanju vansudske nagodbe prethodi postupak u kojem se javno obavještavaju svi tražitelji izvršenja (povjerioci) da mogu podnijeti Vladi Kantona u pisanoj formi u određenom roku prijedlog za zaključivanje vansudske nagodbe, na temelju izvršnih sudskih naslova.
- (2) Prijedlog iz stavka (1) ovog članka će sadržavati pisanu izjavu uz slijedeće bitne elemente:
 - a) spremnost za najveće procentualno odricanje od visine ukupnog duga:
 - 1) ili dijela glavnog duga,
 - 2) i/ili dijela ili u cjelosti pripadajuće zakonske kamate,
 - 3) i/ili dijela ili u cjelosti sudskih troškova;
 - b) suglasnost na isplatu usaglašenog iznosa duga u dogovorenim ratama;
 - c) suglasnost da će nakon zaključivanja vansudske nagodbe povući prijedlog za izvršenje podnesen nadležnom sudu.

Članak 3. **(Mjerila i kriteriji)**

- (1) Kod razmatranja prijedloga za zaključenje vansudske nagodbe, s obzirom na raspoloživa sredstva za ove namjene u Budžetu Kantona, u obzir će se uzimati mjerila, kao što su: period čekanja na listi redosljeda kod nadležne banke, te iznosi dosuđenog glavnog duga, kamata i sudskih troškova, s tim da će se, prednost kod zaključenja vansudske nagodbe dati najpovoljnijim ponudama, odnosno prijedlozima u kojima predlagač, umjesto cjelokupno dosuđenog iznosa, koji potražuje u izvršnom postupku, pristaje na isplatu dijela dosuđenog glavnog duga i/ili dijela sporednih potraživanja.
- (2) U slučaju da dva ili više tražioca izvršenja predlažu jednak procenat isplate dijela dosuđenog glavnog duga i sporednih potraživanja, prednost za zaključenje vansudske nagodbe za isplatu potraživanja imat će tražilac izvršenja, koji ima period dužeg čekanja na evidenciji redosljeda rješenja o izvršenju kod nadležne banke.

Članak 4. **(Komisija)**

- (1) Vlada Kantona će posebnim rješenjem formirati Komisiju za razmatranje prijedloga za zaključenje vansudske nagodbe, u slijedećem sastavu: predstavnik Ministarstva finansija, predstavnici resornih ministarstava na koje se odnose pravosnažne presude koje nisu izvršene, predstavnik Ureda premijera i predstavnik Sindikata budžetskih korisnika.

- (2) Zadatak Komisije iz stavka (1) ovog članka je da objedini sve dostavljene prijedloge za zaključenje vansudske nagodbe i sačini prijedlog redoslijeda za zaključenje vansudskih nagodbi u skladu sa mjerilima i kriterijima iz članka 3. ove odluke.

Članak 5.
(Postupak)

- (1) Nakon isteka roka za dostavljanje prijedloga za zaključenje vansudske nagodbe, Komisija iz članka 4. ove odluke će prijedlog redoslijeda za zaključenje vansudskih nagodbi, dostaviti Kantonalnom pravobranilaštvu na mišljenje.
- (2) Kantonalno pravobranilaštvo će dati mišljenje na dostavljeni prijedlog Komisije, te u slučaju pozitivnog mišljenja na svaki pojedinačni prijedlog, sačinit će prijedloge vansudskih nagodbi, koje će dostaviti Ministarstvu finansija na mišljenje i Vladi Kantona na saglasnost.
- (3) Na osnovu odluke Vlade Kantona o davanju suglasnosti za zaključenje vansudske nagodbe Kantonalni pravobranitelj će zaključiti vansudsku nagodbu sa povjeriocima.
- (4) Sukladno stavku (2) ove odluke u ime javnih obrazovnih ustanova vansudsku nagodbu zaključuje rukovoditelj javne ustanove uz prethodno obvezujuće mišljenje Kantonalnog pravobranitelja .

Članak 6.
(Dostavljanje zaključenje vansudske nagodbe)

Kantonalno pravobraniteljstvo će svaku pojedinačnu zaključenu vansudsku sudsku nagodbu dostaviti Ministarstvu financija na realizaciju i nadležnom sudu koji je donio rješenje o izvršenju.

Članak 7.
(Način realiziranja)

Sredstva za isplatu novčanih potraživanja na osnovu zaključenih vansudskih nagodbi, isplatiće se sa posebne pozicije Budžeta Zeničko-dobojskog kantona za 2014. godinu, određene za te namjene.

Član 8.
(Rokovi realizacije)

Ministarstvo finansija Zeničko-dobojskog kantona će u rokovima utvrđenim u vansudskoj nagodbi realizovati istu i o tome bez odlaganja obavjestiti Kantonalno pravobraniteljstvo Zenica, uz dostavljanje dokaza o isplati, a radi poduzimanja daljnjih pravnih radnji iz nadležnosti Kantonalnog pravobraniteljstva Zenica.

Članak 9.
(Stupanje na snagu)

Ova odluka stupa na snagu narednog dana od dana objave u „Službenim novinama Zeničko-dobojskog kantona“.

Broj: 02-_____ /13.

Datum, 14.11.2013. godine

Z e n i c a

PREMIJER

Munib Husejnagić, dipl.ing.maš.

DOSTAVLJENO:

1x Ministarstvo za pravosuđe i upravu,

1x Kantonalno pravobranilaštvo Zenica, (putem ministarstva),

1x Ministarstvo finansija,

1x „Službene novine Zeničko-dobojskog kantona“,

1x a/a.